



Inatsisartut suleriaasiat § 37 malillugu, immikkoortoq 1 naapertorlugu matumuuna Naalakkersuisunut apeqqut imaattoq saqqummiuppara:

Naalakkersuisunut apeqqut:

1. Suut pissutaappat nunatsinni politiit nunaqavissut tikisitallut akissarsiaasa assigiinngisinnerannut, naak suliat akisussaaffiillu assigiit ingerlanneqaraluartut ?
2. sooq-una akissarsiat ”assigiittussaaniarneraluannik” tapimik taaneqartartoq tamakkiisumik soraarnerussutisiaqaatigineqarsinnaanngitsoq ?
3. Sooq-una akissarsiat ”assigiittussaaniarneraluannik” atuutilersitsineq 1991-imiilli atuutilersinneqarsimanngitsoq tikisitap nunaqavissullu akissarsiaasa assigiinngissutiviata naliga atorlugu ? sooq-una tapeq taanna aallaqqaataaniillu soraarnerussutisiaqaataasinnaanngitsoq ?
4. Suna suullu pissutaappat, nunatsinni politiit maani najugaqavissut akissarsiaasa isumaqatigiinniutigineqarneranni kinguaattoorujussuarternermut ?
5. Aningaasarsiat nalilersorneqartarnerannut (skalatrinn) 35-imut tunngasut kaajallaasitap, Danmarkimi nutaamik akissarsiat pillugit 2008-imi aaqqissuussinermi atorunnaarsinneqarsimasup, nunatsinni politiinut atuutsikkunnaarnissaa Kalaallit Nunatsinni Politiimester-ip qaqugu naatsorsuutigaa ?
6. Sumiiffimmi tapeq sooq kalaallit nunatsinni nunaqavissunut atuutsinneqanngila ?
7. Naligiisitaaneq Naalakkersuisunut qanoq isumaqarpat ? aammami apeqqut taanna danskit oqartussaasuinut qanoq isumaqarpat ?

(Inatsisartunut ilaasortaq, Anthon Frederiksen, Partii Naleraq)

Tunngavilersuut:

2016-imi nunatsinni sulisut sulianillu assigiinnik ingerlatsisut tikisitat kalaalliniit qaffasinnerusumik akissarsiaqartinneqartarnerat pillugu Inatsisartut suleriaasianni § 37 naapertorlugu Naalakkersuisunut apeqquteqaateqarpunga.

Taamanikkut Naalakkersuisut ilaatigut imannak akissuteqarput:

”sumi inunngorsimaneq aallaavigalugu akissarsiaqarneq 1991-imi atuutilersumik atorunnaarsinneqarpoq, taamanli pisortani isumaqatigiissutini tunngavittut piunasaqaataalerpoq, sulisut nunaqavissut kiisalu tikisitat akissarsiaat assigiinngissuseqassanngitsut”.

Taamaakkaluartoq maannamut assersuutigalugu politeeqarnerup iluani ukiorpassuarni eqqartorneqartuarmik tikisitat nunaqavissullu akissarsiaqartinneqarnikkut assigiinngisinneqartuarpur.

Tigussaasumik makku paasissutissiissutigineqassapput politeeq 1. oktober 2008 sioqqullugu atorfeqartoq, aningaasarsianut najoqqutassiap (løngruppe) 2, immikkoortoq 4-imi inissisimasoq skat-ti peernagu tunngaviusumik akissarsiaqarpoq skat-ti peernagu

Kr. 23.270,25 + akissarsiat assigiinngissutaannut tapeq kr 6.481,38, tamakkiisumik soraarnerussutisiaqaataasinnaanngitsoq aamma unnukkut sulinermut tapisiat annertussusaannut sunnuteqanngitsoq.

Politeeq tikisitaq, qulaani aningaasarsianut najoqqutassiap (løngruppe) assigani inissisimasoq skat-ti peernagu akissarsiaqarpoq

Kr. 29.712,83 tamakkiisumik soraarnerussutisiaqaataasussanik + sumiiffimmi tapeq kr. 5.000,-

Malugeqquneqarpoq akissarsiat ”assigiinngissutaannut” iluarsissutaaniartussaangaluartoq aallaqaataani ilaannakuusumik aatsaat ukiut arlallit 1991-ip qaangiunneranni atuutilersinneqarnikummat, taamanikkut massakkumut naleqqiullugu pingasorarterutaa sinnerlugu appasinnerulluni soraarnerussutisiaqataanngilluinnarlunilu.

2008-imi Danmarkimi politiit akissarsialerinerumut nutaamik aqqissuussisoqarmat, akissarsiat pillugit kaajallaasitaq skaletrin 35-imut tunngasoq danmarkimi atorunnaarsinneqarsimasoq Politimestereqarfimmiit nalunaarutigineqarsimavoq, tassungalu

atatillugu Politimestereqarfimmiit allaaserineqarsimavoq kaajallaasitap taassuma kalaallit nunaanni politiinut tunngatillugu atorunnaarsinneqarnissaa PUUJORNEQARSIMASOQ. Taamaammallu aamma nunatsinni politiit nunaqavissut akissarsiaqarnerannut pitsaanngitsumik sunniuteqartoq.

Pissutsit taamaattut akuersaarneqarsinnaangilluinnarput, taamaammallu Naalakkersuisut inussiarnersumik qinnuigissavagut, apeqqutit qulaani pineqartut pillugit Politimestereqarfimmut naalagaaffimmilu oqartussaasunut akisussaasunut tamakkiisumik akissuteqaasiortoqarnissaa piumasareqqullugu.

Ullut suliffiit qulit sapinngisamik qaangiutinnginnerani akineqarnissara kissaatingaara.